

TEJO-aktuale estas retroŝta informilo de TEJO.

2016-09-03, n-ro 428



TEJO havas novajn oficistojn

Ses novaj homoj ĵus aldoniĝis al la stabo de TEJO kiel dungitaj oficistoj. Ili estas Joop Kiefto kaj Baptiste Darthenay kiel komputilistoj, Przemysław Wierboski kiel grafikisto kaj Stela Bezenyei, Łukasz Żebrowski kaj Peter Baláz kiel merkaticistoj. Ili laboros de la 1-a de septembro ĝis la 31-a de decembro 2016.



TEJO serĉas EVS-volontulon

TEJO denove serĉas EVS-volontulon, kiu dum maksimume unu jaro deĵoros en la Centra Oficejo de UEA. Ne nur la organizaĵo profitos de viaj agadoj - la profitado estos ambaŭvoja! Vi laboros kore de la movado, kunlaboros al tre interesaj projektoj (ekzemple organizado de aranĝoj) kaj partoprenados konferencojn reprezentante TEJO-n. Se vi aĝas pli ol 18 kaj malpli ol 31 jarojn, nepre detale [informiĝu pri tiu oportuno](#). La limdato estas ĝis la 4-a de septembro.



73-a IJK okazas en Togolando!

La Estraro de TEJO decidis, ke la 73-a Internacia Junulara Kongreso de UEA okazos en Arenu, urbo en la sudoriento de Togolando tuj apud la Atlantiko. La urbo situas lime de Benino kaj 45 kilometrojn for de la ĉefurbo Lomé. La kongreso okazos de la 5-a ĝis la 12-a de aŭgusto, kio donas entuziasmaj kongresfrekventantoj ripozajn tagojn post la Universala Kongreso de Esperanto, kiu okazos en Seulo de la 22-a ĝis la 29-a de julio. Nepre trafu tiun ŝancon kunligi esperantumadon kun admirado de tiu bela kaj interesa lando.

Laŭ [komuniko](#) sur la retejo de TEJO.



32-a ARKONES okazos en Poznań
(23-a ĝis 25-a de septembro)

Por kulturemaj Esperantistoj temas pri la plej grava aranĝo de la jaro: Jam por la 32-a fojo ĉi-septembre okazos en Poznano la ARTaj KONfrontoj en ESperanto. Aparte bonvenaj estos junaj partoprenantoj, kiuj aliĝos kun 20%-a rabato. Membroj de Pola Esperanto-Junularo partoprenos senpage, kondiĉe de aliĝo antaŭ la 15-a de septembro. Aparta avantaĝo estas la facila atingeblo de Poznano: Flugbiletoj estas akireblaj jam ekde kelkaj eŭroj. Atendos vin steluloj de la Esperanto-kulturo, inter aliaj Fratoj Slezak, Mikaelo Bronŝtejn kaj Tomio Frejarö, membro de La Perdita Generacio. Pliaj informoj ĉe: <http://www.arkones.org>.



Forpasis Detlev Blanke (1941-2016)

D-ro Detlev Blanke, unu el la plej renomaj nuntempaj lingvistoj, forpasis la 20-an de aŭgusto en Berlino. Naskiĝinta la 30-an de majo 1941, Blanke lernis Esperanton memstare en 1957. Li doktoriĝis en 1976 per disertacio pri kompara vortfarado de Esperanto kaj la germana (*Plansprache und Nationalsprache*), kaj akiris docentan diplomon en 1985 per disertacio pri planlingvoj (*Internationale Plansprachen*). En 1988 li fariĝis docento pri interlingvistiko en la Berlina Humboldt-Universitato, kie li daŭre prelegis ĝis 2007. Tra sia aktivado en la Esperanto-movado, Blanke transprenis sennombrajn postenojn. Interalie, Blanke estis sekretario Centra Laborrondo Esperanto en la Kulturligo de Germana Demokratia Respubliko 1968-1980 kaj ekde 1981 de Esperanto-Asocio en Kulturligo de GDR, kiu en 1991 unuiĝis kun Germana Esperanto-Asocio. Plie, la Esperantologiaj Konferencoj, kiuj okazas en ĉiu UK ekde 1978, dankiĝas al iniciato de Blanke. Li estis ege fekunda aŭturo kaj redaktoro: La bibliografio de la publikaĵoj de Blanke ampleksas pli ol mil unuojn. Pro siaj verkoj Blanke ricevis plurajn premiojn, inter aliaj la *Eugen-Wüster-Medalon* kaj la estonan premion *Academicus Paul Ariste*. Al UEA Blanke servis kiel Komitatano tra du jardekoj (1978-98) kaj kiel membro de diversaj komisionoj kaj laborgrupoj. Krome, Blanke estis elektita honora membro de UEA en 2011.

Premioj de Fondaĵo Antoni Grabowski

La Fondaĵo Antoni Grabowski estis kreita en 1988 sur la bazo de grandanima donaco de Adam Goralski (1912-2005). La ĵurio de la fondaĵo, kiu konsistas el Ulrich Lins, Shi Chengtai kaj István Ertl, aljuĝas premiojn meze ĉiun duan aŭ trian jaron. En la Nitra UK estis anoncigitaj la ĉi-jaraj premiitoj: La unua premio (700 usonaj dolaroj) iris al Carlo Minnaja kaj Giorgio Silfer por ilia komuna verko *Historio de la Esperanta literaturo*. Hispana Esperanto-Federacio ricevis la duan premion (300 usonaj dolaroj) pro *Bitoteko*, per kiu elstaraj verkoj estas senpage alireblaj. Premio de 150 us.dolaroj estis donita al Jean Codjo, beninano vivanta en Kanado, kiu valore kontribuis al la Esperanta literaturo per rakontoj riĉigantaj la interkulturan dialogon.

Laŭ Gazetaraj Komunikoj de UEA, [N-ro 633 \(2016-08-24\)](#).

Unustilaj Informiloj de TEJO disponeblas en tejo.org


TEJO en 2012 kreis la Unustilan Informilon por pli bone atingi gejunulojn. La flugfolioj, kiuj prezentas resumajn informojn pri Esperanto, pri TEJO kaj kontaktebloj de Landaj Sekcioj, nun [aperas en 9 novaj lingvoj](#): la arpitana, ĉeĥa, dana, kataluna, hispana, piemonta, slovena, ukraina kaj vjetnama. Ni dankas al Marta Pieczarka pro la altkvalita grafikaĵo kaj enpaĝiga laboro kaj al ĉiuj kiuj ankaŭ volontule tradukis kaj reviziis la informilojn.

Se vi deziras kunlabori pri tradukado kaj revizio de la Unustilaj Informiloj al aliaj lingvoj, skribu al informado@tejo.org

Nova kajero de *Kontakto*

Aperis nova numero de "Kontakto". Ĉi-numere atendas vin aparte akuala kovrila temo: "Kien iras la religioj?". En la kovrila artikolo Emmanuel Wald, doktora studento pri protestanta teologio kaj religiaj sciencoj, el multaj perspektivoj prilumas la rolon, kiun religioj estonte ludos en malfrumoderna socio. Okaze de la publikigo de sia nova albumo "jOmO okcitanas", jOmO gastas en la intervjuo rubriko kaj rakontas interalie pri la estiĝo de "okcitanas". En sia artikolo "Orlando, samseksemo kaj religio", Marcos Kramer analizas la teruran amaspafadon en samseksemula diskejo en Orlando. Vi povas elŝuti la numeron ensalutinte en uea.org

Diskonigu al via amikaro



Vizitu niajn kanalojn



Kolofono

TEJO-aktuale estas retpoŝta informilo de TEJO.

TEJO-aktuale estas senpage abonebla, aperas 2-semajnririte kaj koncize kompilas freŝajn, konkretajn informojn pri la junulara E-movado kaj ligilojn al interesaj retpaĝoj – pli rapide ol povus tion fari paperaj revuoj. Por publikigi vian anoncon retmesaĝu al tejo-aktuale@tejo.org.

Oficiala retpaĝo de TEJO-aktuale: tejo.org/tejo-aktuale

Redaktoro: Jan Kozousek, Aŭstrio, jan.kozek@icloud.com

Eldonas: Tutmonda Esperantista Junulara Organizo (TEJO), <http://www.tejo.org>

Limdatoj por kontribuoj: dimanĉo antaŭ la apero

Retpoŝta abono: http://eepurl.com/bSl_3r.

This email was sent to <<Retpoŝtadreso>>

[why did I get this?](#) [unsubscribe from this list](#) [update subscription preferences](#)

Tutmonda Esperantista Junulara Organizo · Nieuwe Binnenweg 176 · Rotterdam, Zh 3015BJ · Netherlands

